

**Lawatan Negara Gabenor Jeneral Kanada Ke Malaysia Mulai Ahad Ini
Bernama
10 November, 2011**

KUALA LUMPUR, 10 Nov (Bernama) -- Gabenor Jeneral Kanada, David Lloyd Johnston dijadual mengadakan lawatan negara selama empat hari ke Malaysia mulai Ahad ini bagi memperkukuhkan lagi hubungan dua hala.

Menurut Wisma Putra Khamis, Johnston akan mengetuai delegasi termasuk Penolong Timbalan Menteri Luar Kanada (Hal Ehwal Asia), Peter McGovern serta tokoh akademik dan ahli perniagaan.

Lawatan negara itu adalah pertama dari Kanada ke Malaysia, kata kenyataan itu di sini.

Majlis sambutan rasmi akan diadakan di Dataran Parlimen pada Isnin ini dan Yang di-Pertuan Agong, Tuanku Mizan Zainal Abidin dan Tuanku Nur Zahirah akan mengadakan jamuan negara meraikan Johnston dan delegasinya di Istana Melawati, Putrajaya.

Malaysia dan Kanada telah menjalinkan hubungan erat dan mesra menerusi jalinan kerjasama sejak hubungan diplomatik diasaskan 54 tahun lalu.

Semasa lawatan itu, Johnston akan menerima kunjungan Timbalan Perdana Menteri, Tan Sri Muhyiddin Yassin. Delegasi Kanada itu juga akan melawat Pulau Pinang.

Mengulas lawatan itu, Pesuruhjaya Tinggi Kanada ke Malaysia, Randolph Mank berkata lawatan itu adalah atas permintaan Perdana Menteri Kanada, Stephen Harper.

Katanya lawatan itu akan menampilkan dan mempertingkatkan hubungan perdagangan dan politik serta memperkasakan bidang akademik Kanada dan hubungan masyarakat antara kedua-dua negara.

"Lawatan itu akan menonjolkan peluang untuk kerjasama yang lebih luas dalam bidang perdagangan, pelaburan, inovasi dan pendidikan," katanya sambil menjelaskan ia akan membolehkan delegasi negara itu menyaksikan secara lebih dekat mengenai penglibatan negara itu di sini.

Sempena lawatan itu, Johnston dijadual menyampaikan ucap-tama berjudul "Ilmu Diplomasi: Pendidikan dan Gobalisasi dalam Abad ke-21" di Universiti Malaya, kata Mank.

"Tuan Yang Terutama akan meningkatkan profil Kanada sebagai rakan komersil semasa mesyuarat dengan pegawai kanan kerajaan Malaysia dan masyarakat sivil di Kuala Lumpur dan Pulau Pinang," jelasnya.

Mank berkata Johnston juga akan menyertai perbincangan meja bulat mengenai inovasi dengan pakar-pakar dari Kumpulan Industri-Kerajaan Bagi Teknologi Malaysia (MiGHT) dan mengadakan pertemuan dengan komuniti perniagaan Kanada yang bekerja di Malaysia.

Johnston juga akan mewakili Kanada pada lawatan negara ke Vietnam dan Singapura dari 16 hingga 22 Nov ini.

---BERNAMA

Copyright © 2011 BERNAMA

Source: <http://www.bernama.com/bernama/v5/bm/newsindex.php?id=626033>